

REGLANAN PA

KOMPANIANAN DI KONSTRUKSHON I MEDIO AMBIENTE



Nos isla,
nos responsabilidadat



INFORMATIEPUNT

Milieu

Introdukshon

Den e foyeto akí bo ta haña un bista general di e puntonan di atenshon mas importante riba kua kompanianan di konstrukshon mester enfoká i tuma medida pa protehá medio ambiente. E puntonan akí ta forma base di e inspekshonnan ku Direktorado di Supervishon i Mantenshon di Lei ta ehekutá. Si bo ta kumpli ku e puntonan akí, e ora ei bo a pone un paso importante den kumplimentu ku e Dekreto di Establesimentu i Aktivitat BES.

Entrante 1 di aprel 2024 e Dekreto di Establesimentu i Aktivitat BES a drenta na vigor. Esaki ta nifiká ku tur empresa (òf mihó bisá: estableimentu) mester tuma medida pa protehá medio ambiente. Dependiente di e tipo

di empresa, mester tuma mas òf ménos medida pa protehá medio ambiente. Den regulashon ta hasi uso di un repartishon den kuater tipo di empresa. Empresa tipo 1 ta por ehèmpel ofisina i empresa tipo 4 ta por ehèmpel e empresanan petrokímiko ku ta almasená kantidatnan grandi di kombustibel.

Mayoria kompania di konstrukshon ta e asina yamá empresa tipo 2. E empresanan akí no tin mester di un pèrmit di medio ambiente, pero pa nan ta suficiente pa hasi un notifikashon. Sierto kompanianan tin riesgo èkstra i pa e motibu akí nan ta un empresa tipo 3. Por ta ku ta kualifiká bo kompania tòg komo tipo tres i pues komo un empresa ku tin obligashon obligashon di buska un permit.

E wèpsait di e **Punto di Informashon Medio Ambiente** na Kámara di Komèrsio (www.infomilcn.com) ta duna mas informashon tokante e repartishon di tipo. Via e wèpsait akí bo por hasi un notifikashon òf entregá un petishon na Entidat Públiko Boneiru.



1 Kuida medio ambiente



Komo kompania mas tantu posibel bo ta evitá daño na medio ambiente.



Medio ambiente ta e ambiente di biba di hende i naturalesa. Bo ta hasi esaki pa medio di 'good housekeeping', of: sòru pa bo kompania ta den bon kondishon i mantené esaki asina. Ta trata akí di tuma medida tantu tékniko komo organisatorio. Bo ta sòru pa un bon mantenshon di bo mashinnan i aparatonan. Tin palabrashonnan bon kla tokante ken ta responsabel pa esaki. E empleadonan ta haña informashon tokante e motibu pakiko mester tuma medida i nan ta haña instrukshon tokante kon ta evitá daño na medio ambiente. Bo ta sòru pa tur empleado kumpli ku e instrukshonnan.

2 Bon uso di materia prima


Boneiru ta un isla chikitu ku un ekosistema frágil.

Pa medio di anda kuidadosamente ku materia prima, manera awa, energia i material di konstrukshon, e paisahe natural ta keda konservá.




Esaki ta importante, pa motibu ku nos isla ta dependé di su naturalesa, prinsipalmente pa turismo i biodiversidat. Esaki no ta ekonomisá solamente riba uso di energia i awa, pero e ta redusí e kantidat di shushi tambe ku mester keda prosesá, loke ta spar tantu sèn komo materia prima.

3 Kolektá shushi den forma separá



Mester almasená shushi den forma separá den bo kompania.



Mester almasená i transportá produktonan residual mas tantu posibel den forma separá. Hopi shushi ta adekuá pa reuso, manera material di piedra, betòn i palu. E produktonan ku sigur mester entregá apartá ta papel i karton, plèstik, aluminio i glas. Sòru pa diferente baki apart pa diferente tipo di shushi. Asina tantu biaha ku ta nesesario mester transportá e shushi.

Sustansianan peligroso mester wòrdu deshasí di nan separadamente.


4 Asbèst

NO HASI



Ora ku tin trabou di konstrukshon ta tumando lugá bo por topa ku asbèst tambe.

Apsolutamente no tin mag di trese asbèst den ambiente di biba.



HASI

Na momentu ku topa ku asbèst kaminda tin trabou ta tumando lugá, mester tuma medida èkstra. Tin regla spesial pa ora di kita plachi di dak di asbèst-semènt. Na momentu di kita asbèst mester tuma medida spesial. Mester empaketá i transportá e plachinan apart. No tin mag di almasená nan den bo kompania. Asbèst ta peligroso i e ta okashoná kanser. Pa trahamentu ku asbèst tin regla for di e Lei di siguridat pa protekshon di empleado (Veiligheidswet ter bescherming van de werknemers) tambe ku ta na vigor. Konsultá e wèpsait di Rijksdienst CN pa mas informashon.

5 Awa shushi

Awa shushi sanitario i otro awa shushi doméstiko

NO HASI



Ta deshasí di awa shushi sanitario i otro awa shushi doméstiko den un kloaka òf den un 'septic tank'.




HASI

No tur awa shushi di un kompania tin mag di bai den kloaka òf den 'septic tank'. Tin mag di basha awa shushi prosedente di bashamentu di betòn riba suela. Esaki no tin mag di resultá den kloaka òf den 'septic tank'.

5 Awa shushi


Berpùt



Ainda bo tin un berpùt?

E ora ei promé ku 1 di yanüari 2029 mester remplasá esaki ku un 'septic tank' òf ku un konekshon riba kloaka.

6 Protekshon di suela i di awa den supsuelo, almasenamentu di supstansia peligroso




Líkido ku ta forma un menasa pa suela, manera zeta, fèrf, coating i thinner, por kontaminá suela seriamente.

Pa e motibu akí mester evitá lèkmentu i almasenamentu inkorekto di e líkidonan akí.

Pa medio di almasená líkido ku ta forma un menasa pa suela den un empake adekuá riba òf den un baki pa fangu líkido ku ta lèk, òf den un fasilidat di almasenamentu destiná pa esaki, por evitá kontaminashon di suela. Ora ku tòg tin líkido a plama riba suela, mester limpia esaki mesora. Ta importante pa tin suficiente material pa apsorbé den stòk pa esaki. Den kaso ku e supstansianan akí a penetrá den tera, mester koba saka e tera mesora. Mester transportá e material pa apsorbé òf e tera ku supstansia peligroso den dje pa Selibon komo shushi peligroso.

7 Bòter di gas



Den konstrukshon nan ta usa diferente tipo di gas.

Bo tin mas ku 125 liter na bòter di gas yen i bashí? Warda esakinan den un fasilidat di almasenamentu.



E stòk di gas pa traha kuné no tin mester di bai den e almasenamentu. Warda un bòter di gas semper pará règt riba su kurpa, di manera ku e siguridat den e bòter por funshoná bon. Bòternan di gas mester ta sigurá pa nan no kai, nan mester ta bon wantá pues. E bòternan no tin mag di para den solo, pone nan bou di un afdak. Si tin mas ku un bòter di gas wardá na un sitio (no pegá na un aparato ku ta usa gas), mester konstruí un fasilidat ku ta seif kontra kandela. Mas informashon tokante e fasilidatnan di almasenamentu akí por haña riba www.infomilcn.com.

8 Evitá molèster di zonido



Mas tantu posibel mester evitá molèster di zonido, i si esaki no ta posibel mester limitá e molèster.



Konosementu di e kantidat di zonido ku ta keda produsí ta un bon komienso pa manehá e riesgo: bo mester midi pa bo sa. A base di esaki bo por tuma medida tékniko òf organisatorio. Riba tereno tékniko bo por investigá si por evitá e zonido den direkshon di terseranan pa medio di konstruí algu ku ta wanta e zonido. Un otro posibilidat ta pa skohe un otro sistema di traha. Den kaso di medida organisatorio bo por pensa riba: keda den kontakto ku e bisindario, informá e bisindario ora tin kestion di zonido duru, limitá e kantidat di ora ku tin zonido i tene kuenta ku trankilidad den mardugá.

9 Evitá molèster di stòf




Transporte di tera i prosesamentu di material di piedra ta okashoná stòf. Importante ta pa evitá stòf mas tantu posibel.




Spùit awa òf chupa e stof na e fuente. Na momentu di transportá tera, mester tapa e tera ku un lona.

10 Instalashon pa fria



Por lo ménos un biaha pa aña bo tin ku laga un kompania ku nan ta konsiderá komo eksperto inspekshoná bo instalashon pa fria.

Èrko, frishidèr i frizer ta hasi uso di un asina yamá refrigerante.




Mayoria di e refrigerantenan ku nan ta usa ta venenoso, i/òf fásilmente inflamabel i dañino pa medio ambiente. Pa mantenshon di instalashonnan pa fria ku refrigerante tin reglanan spesial na vigor. Esaki ta wak si e instalashon ta funshoná den un forma seif ainda i si tin lèk den e sirkuito di fria. Ta importante ku semper e instalashon pa fria ta bon alkansabel, pa operashon, inspekshon i mantenshon. Bo mes no tin mag di saka e refrigerante for di un instalashon pa fria. Warda e rapòrtan di mantenshon serka e instalashon òf den bo kompania.

11 Instalashon pa paga kandela



Pa por paga un kandela ku ta kuminsando, mester tin suficiente aparato (portatil) pa paga kandela presente.



E aparatonan pa paga kandela mester ta bon visibel pa tur hende i fásilmente alkansabel. E aparatonan pa paga kandela mester ta kologá na un luga fiho. Anualmente un eksperto tin ku kontrolá e aparatonan pa paga kandela i e mester pega un steker di inspekshon riba nan.

Na unda ta haña e reglanan di lei

Riba wetten.overheid.nl i lokale.overheid.nl por haña tur regulashon nashonal i insular. Por haña e reglanan pa mayoria di e kompanianan di konstrukshon, di instalashon i di kontratista den kapítulo 2 di e Areglo di Establesimentu i Aktivitat BES (Regeling inrichtingen- en activiteiten BES – RIA BES). E reglanan akí ta konta pa un sitio di konstrukshon òf un tayer, no pa mantenshon insidental. For di ordenansanan insular tambe por tin regla ku ta na vigor: e ordenansa di shushi i e ordenansa di awa shushi.





INFORMATIEPUNT
Milieu

**Na unda bo ta
haña nos?**



Kamer van Koophandel Bonaire
Kaya Amsterdam 23, Bonaire, CN



informatiepuntmilieu@kvkbonaire.com



www.infomilcn.com

Orario



Habrí durante dianan di trabou
entre 08.00 or pa 12.00 or